

TE HEHEURAA API

I neia i te piha neneiraa Univereti i Roto Miti i Utah no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa.

Nu. 2

Febuare, 1918

Mat. 12

“Inaha râ, no te tia-faahou-raa o te Mesia e ora'i to te ao atoa nei, e tae faahou mai ai ratou i mua i te aro o te Fatu ra;

E e tupu ai te parau no te tatarahapa ra, tera ia, o te tatarahapa ra, o te ore ia e tâpûhia a titirihia'i i roto i te auahi; o te ore râ e tatarahapa ra, o te tâpûhia ia, a titirihia'i i roto i te auahi, e roohia mai ai i te pohe varua, oia te pohe piti; ua tâpû-ê-fahou-hia hoi ratou i ta te parau-tia.”

—Helamana 14:17-18.

TE POHERAA VARUA.

Eaha ra hoi te poheraa varua? O te hoê uiraa tera tei haapeapea i te mana'o o te mau feia maitatai e raverahi. O te pohe ta tatou i ite ra o te taa-ê-raa ia o te tino e te varua; e ia pohe te hoê taata te faea nei te mau melo o te tino nei i te rave i ta ratou ohipa; pê roa ihora te tino e ua riro faahou ei repo ia au i ta te Atua i parau mai ia Adamu.

“E ho'i noa'tu oe i raro i te repo, no reira mai hoi oe; e repo hoi oe, e e ho'i faahou atu â oe i te repo.” Ia pohe hoi te taata ei reira i matarahia'i te varua o tei reva'tu i te vahi i haapaohia no ratou, oia hoi o tei parauhia e para-daiso; ei reira hoi e faea'i taua varua ra e tae roa'tu i te tia-faahou-raa, i te tau hoi e apiti-faahou-hia te tino e te varua a ora faahou mai ai e a muri noa'tu.

No te mea i moe ai te tino tahuti nei i roto i te repo e ua riro hoi e repo, ua mana'o hoi te tahi pae taata o te hopea ihora hoi te reira no te tino e no reira o te piti o te poheraa o te haamou-roa-raa ia o te varua; e o teie poheraa piti o te pohe ia e iri mai i nia i te feia hara atoa. E hape hoi te reira huru mana'o. O te pohe nei, oia hoi te poheraa o te tino tahuti nei e ere ia i te taa ê roa raa o te tino e te varua no a muri noa tu. Noa'tu e ua ho'i te tino tahuti i te repo no reira mai oia e ua reva'tu te varua i paradaiso, i roto i te tia-faahou-raa e faahouhia taua tino ra ei tino varua e e apiti-faahouhia taua tino ra e te varua e e ora faahou mai. Na roto i te taraehara o te Mesia e tae mai ai teie maitai rahi i nia i te mau taata atoa, noa'tu to ratou maitai e aore râ to ratou haapao ore i roto i te oraraa tahuti nei. Oia hoi ua haapaohia e te Atua te tia-faahou-raa no te taata atoa te maitai e te ino atoa. Na Paulo i parau mai i roto i Te Ohipa: "Te tiaturi nei au i te Atua o ta ratou atoa hoi ia tia nei, e e tia-faahou-raa to tei pohe, te feia parau-tia e te feia parau-tia ore." Te Ohipa 24:15.

Ua haapii atoa mai to tatou Faaora e faaroo ai te feia atoa i roto i te apoo ra i ta'na re'o, e o tei rave i te ohipa maitatai e tia mai ia i te ora mure ore, e te feia rave i te ohipa iino e tia mai ia e rave i te pohe. No reira i papu ai e tia mai te mau huru taata atoa mai te pohe maira.

O te pohe varua o te faataa-ê-raa'tu ia i te aro o te Atua no a muri noa'tu, i roto i te mauui mure ore. No reira o te pohe piti oia hoi te pohe varua o te utua hopea ia e iri mai i nia i te feia parau ino ra; e o taua pohe ra e hoê â ia i te pohe matamua i roohia'i Adamua i tiahihia'tu'i oia i rapae au i te o Edene mai mua'tu i te aro o te Atua. Te na ô maira te Buka Fafau e, "E no reira, ua faaue au, te Fatu o te Atua, ia hurihia oia (Adamu) i rapae i te ô i Edene, mai mua'tu i ta'u aro, no to'na hararaa, i pohe ai oia i reira i te pae varua ra, o te pohe matamua ia, oia hoi, te reira ra pohe, o te pohe hopea hoi ia, o te pae varua, o te parauhia'tu

ia i te feia rave hara, ia parau atu vau e, A haere ê atu outou te feia faainohia.

Area, inaha, e parau atu vau ia outou, e ua horoa'tu vau, te Fatu o te Atua, ia Adamu e i to'na ra huaai, eiaha ratou ia pohe i te poheraa o te tino nei e tae noa'tu i te tonoraa'tu vau, te Fatu o te Atua, i te mau melahi ei faaite atu ia ratou ia tatarahapa e ia faaorahia na roto i te faaroo i te i'oa no ta'u Tamaiti Fanau Tahi.

E ua na reira vau, Te Fatu ra o te Atua, i te faataaraa'tu na te taata i te mau mahana no to'na tamataraahia; ia riro na roto i to'na pohe tino e faatiahia'i oia ei mea pohe ore no te ora mure ore, oia hoi te feia atoa e faaroo;

E te feia faaroo ore ra, i te pohe mure ore, e ore hoi ratou e faaorahia i to ratou pohe varua, no te mea aore ratou i tatarahapa na." B. F. 29:41-44. (B. F. Sanito 28: 11-12.)

Na teie parau i nia nei i haapii mai e e piti pohe te iri mai i nia ia Adamu no ta'na hara, o te matamua, o ta te varua ia i tae mai i nia ia Adamu ma i te mahana i amu ai raua i to te raau i rahuihia ra, e o te piti ra o ta te tino ia; ua riro hoi Adamu ma ei mea tahuti e ua roohia-noa-hia raua e to raua huaai i te mau pohe raa o te tino nei e tae roa'tu i te taa-ê-raa o te tino e te varua. Hou teie poheraa i tae mai i nia ia Adamu na te Fatu i haapii mai ia'na i te Evanelia e te ravea e tae faahou ai oia i mua i te aro o te Atua, oia hoi na roto i te taraehara o te Mesia. Ua rave hoi o Iesu i te pohe i nia Ia'na iho ia ore te taata ia mau i roto i te pohe e a muri noa'tu; e ia tia mai hoi te taata paa-toa i nia mai roto mai i to ratou mau menema ia tae te tau i haapaohia e te Atua. Na te parau a Alama e haapapu maitai i taua vahi ra; tera mai ta'na parau:

"Inaha râ, ua haapaohia te pohe no te taata; e mai ia ratou hoi i tâpû-ê-hia'tu i te raau ora ra, ia tâpû-atoa-hia'tu ratou i te ao nei, e ua moê atura te taata e a muri noa'tu, e riro ihora ratou ei taata mairi.

No te reira e ite ai tatou e, ua tâpû-ê-hia to tatou na metua matamua ra i te pae tino, e te pae varua atoa, i te aro o te Fatu ra; e ua ite hoi tatou e, ua riro atura raua i te pee i to ratou iho hinaaro.

E teie nei, inaha, e ere i te mea tia ia faaorahia te taata i to'na poheraa tino, no te mea e faaore te reira i te ravea rahi oaoa;

Aita o te varua e poheraa, ua faatupu râ te mairiraa ra i te poheraa varua e te poheraa tino atoa i nia iho i te mau taata atoa ra, oia hoi i tâpû-ê-hia ratou i te mata o te Fatu ra, e e mea tia hoi ia faaorahia te taata i taua poheraa varua ra.

E no te mea ua riro te taata ei feia haapao noa i ta te tino ra, i ta te faufau, e ta te demoni i to'na huru mau, ua riro atura teie nei vai-tamata-raa ei taime faaineineraa no ratou; oia hoi ei taime ia faaineine. Alamo 42:6-10.

No teie nei mau parau i ite ai tatou e, ia tiahihia'tu ai Adamu ma i rapae au i te ô Edene e mea tia ia tuu mai ai te Fatu te tahi ravea e ora mai Adamu e to'na ra huaai i taua pohe varua i roohia'i ratou. E inaha ua tuu mai ai te Fatu i te Evanelia ei ravea faaora i taua poheraa ra. Aita râ te Fatu i hinaaro ia ora oioi noa mai, ia vai râ ratou i roto i te tahi tau tamataraa ei haapiiraa e ei faaineineraa no te utua rahi e tae mai. O to tatou oraraa nei o taua tau tamataraa ia. E au hoi teie oraraa nei ei haapiiraa e ei faaineineraa hoi, e e tia hoi ia maiti tatou i te haapao maitai e aore râ i te haapao ore i ta te Evanelia i haapii mai. E mea maitai ia tai'o outou i te pene 9 no te II Nephi i roto i te Buka a Moromona na te reira e haapapu maitai i taua vahi ra.

Na Helemana i roto i ta'na buka i parau mai te hoê parau tano maitai i taua vahi ra, tera mai hoi tana parau:

“Inaha râ, no te tia-faahou-raa o te Mesia e ora'i to te ao atoa nei, e tae faahou mai ai ratou i mua i te aro o te

(E tuatihia i te api 21)

Te Ao Varua.

(Tuatiraa)

Ua papu roa ia tatou e te oaoa mau ra taua mau varua ta Aberahama i faaite maira, a faaroo ai ratou i te uiraa ta te Atua i ui atu ia Ioba, i te na ôraa e:

“Ua parau mai Iehova ia Ioba no roto i te puahi'ohi'o, na ô maira,

O vai teie e haapouri i te haapaoraa; i te parau ana'e ra aore i ite ra? A tatua na i to tauupu mai ta te taata ra; e ui na vau ia oe, e na oe e faaite mai ia'u. I hea oe ia'u i hamau i te tumu o te fenua nei? a faaite mai na, peneia'e te ite ra oe. Na vai i tuu i te faitoraa, ua ite hoi oe na? e na vai i tatai i te taura na nia iho? I haamauhia te niu i nia i te aba? e na vai i tuu i te ofai tihi, A fatu atoa'i te mau fetia poipoi i te himene, e ua pii noa te mau tamarii atoa a te Atua i te oaoa?” Ioba 38:1-7.

E ui mai te taata taio vea nei e, o vai mau ra te hoê pae o taua mau tamarii a te Atua ra o tei pii noa'tu i te oaoa mai ta Ioba i faaite maira. Na te Evanelia a Luka tatou e haamaramarama mai i te reira vahi, a taio na i te pene 3 e i te irava 23 e tae noa'tu i te irava 38; te na ô maira te irava hopea, oia, te 38.

“O te tamaiti na Enosa, e o Enosa e tamaiti oia na Seta, e o Seta e tamaiti oia na Adamu, e o Adamu e tamaiti oia na te Atua.”

Eiaha tatou e faaea noa i nia i taua irave ana'e ra te na ô maira te hoê papai parau tahito ra e:

“Ei reira te repo e ho'i ai i raro i te repo no reira oia ra, e ho'i râ te varua i te Atua i horoa maira.” Koheleta 12:7.

A ui a'ena tatou ia tatou iho e, eaha ia e nehenehe ai ia tatou ia hi'o atu i te hoê vahi mai te mea e aore tatou i tae i reira i mua'tura. No reira e homa e, eaha ia e nehenehe ai i to tatou mau varua ia ho'i atu i te Atua ra maori râ e mai

i reira mai to tatou mau varua nei.

A taio hoi tatou i ta Paulo i parau maira. Te na ô maira oia:

“E metua hoi to tatou to te tino nei, o tei au mai ia tatou, e ua faaite hoi tatou, eiaha ia rahi atu to tatou aararo i te metua o te varua nei, e ia ora’tu?”

Aita o Paulo i vai na i roto i te pōiri i te parau e, o te Atua o te Metua mau ia o to tatou nei mau varua, e tana mau varua ta Paulo i parau maira, te parahi mau ra ratou i te ao varua hou i tae mai ai i roto i teie nei ao.

I te taeraa mai te pohe i te tino tahuti nei, ei reira e hunahia’i teie nei tino repo, e teie tino repo nei, e ho’i ia i te repo no reira mai oia ra; te varua râ, e ho’i ia te reira i Paradaiso.

I to Iesu faraa mai i to’na ra mau pīpī i muri a’e i to’na tia-faahou-raa, “Hitimaue atura ratou, e te mehameha, parau a’era e varua ta ratou i hi’o ra,” parau atura râ Iesu ia ratou, “A hi’o mai na i tau rima e tau avae; o vau mau â; a fâfâ mai na ia ite; aita o te varua e i’o e te ivi mai to’u nei, ta outou e hi’o mai nei. Luka 24:37-39. Na taua mau parau i nia nei ra e haapii mai ia tatou e, te vai mau ra te varua o te taata, hou a fanau mai ai te tino repo nei, e taua varua ra, o te hoê mau ia mea ora mate i’o e te ivi ore. E te vai mau atoa ra te ravea i taua mau varua ra i te haapii i te mau mea ta te Atua i hinaaro i te haapii ia ratou ra, e ua noaa hoi ia ratou te ite e te paari. E hau râ te hoê pae i te itotio i te tahi pae, mai te tamarii a te taata nei te huru; ua hau te hoê mau taata i te itoitio i te tahi pae i roto i teie nei ao, e ere mau anei ia.

Te vai nei na huru e toru no to tatou mau vaura, oia hoi,
1.— Te mau varua tatino-ore-hia ra, i te tino tahuti

nei o ratou ia o tei ore â i rave i te tino tahuti noa.

2.— Te mau varua tatinohia ra i te tino tahuti, o te mau varua ia o te parahi i roto i te tino tahuti nei i teie nei â mahana. e o tatou ia.

3.— Te mau varua râ o tei iritihia to ratou tino tahuti ra, o tei haere ia na roto i teie huru o te oraraa nei e o tei haapae i te tino tahuti i roto i te repo, e o te tia faahou i te hopea a tahoê-faahou-hia'tu ai, te varua i te tino, o to te feia paran-tia ra te ore roa e faataa-ê-faahou-hia te varua i to'na tino tahuti ore ra.

Te na ô maira te Atua ia Ieremia:

“Hou i hamanihia'i oe e au i roto i te opu, i ite ai au ia oe; e aita oe i fanau, i faataahia'i oe e au: e ua haapaohia oe e au, ei peropheta na te mau fenua ”
Ieremia 1:5.

Na roto i taua parau a te Atua ia Ieremia ra i noaa'i ia tatou te ite e, ua faataa te Atua ia Ieremia ei peropheta hou i tae mai ai oia o Ieremia i te ao nei a rave ai oia i te tino tahuti nei. Na te reira atoa tatou i haapii papu mai e, na roto i to Ieremia haapao maitai i te ao varua ra ua noaa ia'na te ite e te paari. E aita hoi i hapa taua maitiraa ia Ieremia ra ei peropheta hou i tae mai ai oia i te ao nei i te mea e, ua haapao maitai oia i taua ohipa ta te Atua i horoa mai ia'na ra; aore roa, o Ieremia i faatau e hoê iti a'e, rahi noa'tu te mau ati e te mau peapea i farereihia e ana ra.

Ua haapii papu-roa-hia tatou na roto i ta Iesu i parau mai e, te vai mau ra te mau varua i te ao varua ra hou i tae mai ai i teie nei ao. Te na ô maira te evanelia a Ioane.

“Aore roa e taata i tae i nia i te ra'i maori râ o tei haere mai i raro mai nia mai i te ra'i ra.” Te na ô faahou maira o Ioane.

“Ahiri paha outou e ite na i te Tamaiti a te taata i te ho'i-faahou-raa i nia i te vahi ta'na i parahi i mutaa ihora?”

Ioane 6:62.

Na teie nei nau irava tatou i faaite e e ore roa te hoê taata e ho'i atu i te ra'i ra maori râ mai reira mai oia, na teie nei mau parau i papaihia i nia nei no te ao varua ra, tatou i haapii mai e no ô mai i te ao varua to tatou mau varua atoa.

Ioane a Moniko.

Te Parau Niuniu.

Ua faaotohe te Beretane i te Purutia i nia mai i Epehy. Huru maitai roa'tura i nia i te reni aroraa, aita e vero, e te tamau noa ra te Purutia mau pupuhi faaû manuïa ore.

Ua roaa i te Beretane te hoê mou'a teitei e vai e 90 mai-le i te pae apatoerau i Bagadana, e te horo noa ra te Turetia ma te aro ore.

Ua ani te hau Farani e te hau Beretane hoi i te hau Tapone e haere e aro i te enemi Purutia i Siberia Rutia.

Ua faatia o Farani e o Beretane atoa ia Tapone e haere e aro i te enemi i Rutia, oia hoi, i te Purutia i Rutia ma te tiaï noa'tu i te parau faatia a te hau Amarika. Te tiaï noa ra hoi to Tapone i te re'o o Amarika.

Te haere papu noa ra te Beretane i mua i nia mai i Ierusalem.

(Tuatiraa)

Fatu ra; E; e tupu ai te parau no te tatarahapa ra, tera ia, o te tatarahapa ra, o te ore ia e tâpûhia a titirihia'i i roto i te auahi; o te ore râ e tatarahapa ra, o te tâpûhia ia, a titirihia'i i roto i te auahi, e roohia mai ai i te pohe varua, oia te pohe piti; ua tâpû-ê-faahou-hia hoi ratou i ta te parau-tia." Helemana 14:17-18.

Tera'toa te tahi irava parau a te peropheta Alama o te na ô e, "E teie nei, inaha, i parau iho nei au ia outou i te pohe o te tino pohe nei, e te tia-faahou-raa hoi o te tino pohe nei. Te parau atu nei au ia outou e, e faatiahia teie tino pohe nei mai te pohe mai ei tino pohe ore, oia hoi mai te pohe matamua i te ora, ia ore ratou e pohe faahou; e tuatihia to ratou varua i to ratou tino, e e ore e faataa-ê-faahou-hia; e ua riro te reira ei mea varua, e ei mea pohe ore, ia ore ratou e ite faahou i te mea tahuti noa ra." Alama 14:15.

Te na ô maira te tahi haapiiraa i roto i te Buka Fafau, "E inaha amene e parau atu vau ia outou, hou te fenua e haamouhia ai e faaoto ta'u melahi rahi ra, o Mihaela, i ta'na ra pû, e i reira te feia atoa i pohe ra e ara mai ai, e maheu hoi to ratou ra mau menema, e tia mai hoi ratou i nia; oia ia, o te taatoa ra; e te feia parau-tia ra e haaputuhia ia i ta'u rima atau no te ora mure ore; e te feia rave hara ra i ta'u rima aui, e haama vau i farii i mua i te aro no te Metua." Buka Fafau 28:7.

No teie nei mau parau tatou i tai'o nei i ite ai tatou e e faaorahia mai te mau taata atoa i te poheraa o te tino pohe nei, oia hoi e faatia-ana'e-hia mai te taata taatoa ra i te pohe o te tino tahuti noa nei, noa'tu te huru o te taata. E faaho'ihia mai te feia paari e te feia apî, te tîtî e te tiamâ, te tane e te vahine, te feia ino e te feia parau-tia atoa hoi. E ia faaorahia mai te taata mai te pohe maira ei reira ratou e arataihia e e haavahia hoi i mua i te aro o te Fatu, i tei au i ta ratou ohipa maitai e ta ratou ohipa ino i ravehia

i te pae tino nei, Ei reira hoi e faautuahia te feia rave tatau i te hara i te utua ino roa, oia te piti o te pohe; e faataa-ê-hia'tu ai ratou i te aro o te Atua e e parahi i te hoê vairaa mauui mure ore ra.

No te mea e aroha faito ore te Atua eita rea e taata o te ore e ite faahou i te aro o te Atua; e e rrio hoi ia hope te utua e iri mai i nia i te feia rave hara e ia tatarahapa ratou ei reira e faaho'ihia mai ratou i te mau vahi huru maitai ae.


Na te mau parau mo'a hoi i haapii mai e o te piti o te pohe oia hoi te pohe varua, e ere ia i te haamou-roa-raa o te tino e te varua, o te faataa-e-raa'tu râ hoi i te aro o te Atua, e i te tapu-ê-hia'tu i te te parau-tia. O ratou o te roohia i taua pohe e parauhia ia ratou e mau Tamarii o te Pohe e e riro ratou i te pee atu ia Satani.

Farani Fulumare.

TE MAU PARAU API.

E ohipa tapitapi roa te ohipa mutoi i te oire rahi Chicago i Amarika. I roto i na matahiti e maha ua pupuhi hia e ono ahuru mutoi. E piti ahuru o taua mau mutoi ua pohe roa'tu e te toea ua ora mai. Na te mau eia haru e te feia rave hara ratou i pupuhi ia auau hia'tu.

E hoho'a api te faaitehia nei i roto i teie vea no te oire tahito o Gaza. Ua riro teie oire i te mau nuu o te Bare-tane i roto i te avae Novema. Ua parauhia teie oire i roto i te Genese 10:19; o te na opani no'na ta Samasona i hopoi i nia i te mou'a. Te mau tumu rarahi i iteahia i te hoho'a e mau tumu olive ia, ua parauhia te tahi pae o taua mau tumu ra e hoê tausani to ratou matahiti, e ia faito hia ua roaa e 19 avae i te haaatiraa.



Te oire tahito O Gaza e te mau aua faaapu i fatata mai.

Tei te hoê mataienaa i Amarika te tahi uri ruau roa, oia hoi ua roaa i te piti ahuru e ma ono o te matahiti. E uri iti uouo e te poria roa; no ò mai Farani oia.

Te hamani nei te Hau Amarika i te tahi mau pahi huru ê roa, oia hoi, e ere ïa te tino pahi e mea auri e aore râ e raau ua hamanihia râ i te timâ oia hoi te pua farani anoihia i te mau ofai hu'ahu'a e te one. E tuuhia hoi i roto i te pua i te tahi mau auri, e te mau niuniu hoi ei faaetaeta i te pua. Te mau pahi ta ratou i hamani nei e au hoi ia Moana i te rahi.

No te mea ua roohia te mau melo o te Eklesia nei e noho i te fenua Mexico, i te mau peapea rau te huru te tonohia'tu nei te Apostelolo ra o Antone Aivini e tauturu atu ia ratou. Te vai â te peapea tahito i ò i Mexico oia hoi te e orure hau to taua fenua e te tama'i noa nei te tahi pae i te tahi pae. Ua ite maitai te Aposetolo ra o Autone i te mau peu o taua fenua ra, e mea maoro hoi to'na parahiraa i reira.

E mauruuru to te Eklesia e te mau hoa atoa no te Orometua Davi o te ho'i atu i to'na fenua i Amarika e faaroo i te parau apî e ua tapae oia i te fare o to'na metua i te mau mahana o te Matahiti Apî; mauruuru roa to'na mau hoa tahito i te farerei mai ia'na Ia tae te 21 no Febuare nei ei reira ua faaipoipohia raua te hoa here no'na o te tiaï maite i to'na ho'iraa mai mai te taviniraa i roto i te aua o te Fatu.

TOAE A MAERE, Faaau Parau, Rue Dumont d'Urville, Orovini, Papeete, Tahiti.
ERNEST C. ROSSITER, Imprimeur, Rue Brea et de la rue Damont d'Urville, Papeete, Tahiti.